



ডাকসু-জাকসু নির্বাচন ওয়ান ইলেভেনের নীলনকশায়: পাপিয়া



সংগৃহীত ছবি

বিএনপির সাবেক সাংসদ অ্যাডভোকেট সৈয়দা আসিফা আশরাফি পাপিয়া অভিযোগ করেছেন যে ডাকসু-জাকসু নির্বাচন ওয়ান ইলেভেন সরকারের সময়কার মতো নীলনকশা অনুযায়ী অনুষ্ঠিত হচ্ছে। তিনি অন্তর্বর্তী সরকারের নিরপেক্ষ ভূমিকা পালনের আহ্বান জানিয়ে বলেন, গণতন্ত্র প্রতিষ্ঠা ছাড়া দেশে শান্তি ফিরে আসবে না। বাংলাদেশ জাতীয়তাবাদী দল (বিএনপি)-এর সাবেক সংসদ সদস্য অ্যাডভোকেট সৈয়দা আসিফা আশরাফি পাপিয়া দাবি করেছেন, বর্তমান সময়ে অনুষ্ঠিত ডাকসু, জাকসু ও রাকসু নির্বাচন ওয়ান ইলেভেন সরকারের ষ্টাইলেই হচ্ছে। তার অভিযোগ, এখানে আগেভাগেই ঠিক করা হয় কাকে কত শতাংশ ভোট দেওয়া হবে এবং কোন পদে কে বসবে।

শনিবার চাঁপাইনবাবগঞ্জ-২ (গোমস্তাপুর-নাচোল-ভোলাহাট) আসনের নির্বাচনী মোটর শোভাযাত্রা শেষে আড্ডাবাজারে এক পথসভায় তিনি এসব মন্তব্য করেন। তিনি বলেন, ২০০৮ সালের নীলনকশার নির্বাচনের মতোই এখনকার শিক্ষার্থী সংসদ নির্বাচনে দখলদারিত্ব চলছে।

অন্তর্বর্তী সরকারকে উদ্দেশ্য করে তিনি বলেন, গত ১৫ বছর জনগণ ভোটাদিকার থেকে বঞ্চিত ছিল। ৫ আগস্টের ছাত্র-জনতার রক্তত্যাগের সম্মান দিতে সরকার ব্যর্থ হয়েছে। এ সময় তিনি অভিযোগ করেন, ছাত্রলীগ ছাড়া অন্য কোনো সংগঠনকে দীর্ঘদিন শিক্ষা প্রতিষ্ঠানে টিকতে দেওয়া হয়নি। এমনকি ছাত্রশিবিরও ভিন্নভাবে সুবিধা নিয়ে রাজনৈতিক খেলায় অংশ নিয়েছে।

তিনি জোর দিয়ে বলেন, আবু সাঈদ ও মুক্তদের হত্যার বিচার না হলে দেশে গণতন্ত্র প্রতিষ্ঠিত হবে না। বিচার নিশ্চিত হওয়ার মাধ্যমেই প্রকৃত শান্তি ফিরে আসবে। একইসঙ্গে তিনি চাঁপাইনবাবগঞ্জ-২ আসনে আগামী জাতীয় সংসদ নির্বাচনে বিএনপির মনোনয়ন প্রত্যাশা করেন এবং স্থানীয় নেতাকর্মীদের সহযোগিতা কামনা করেন।

সভায় উপস্থিত ছিলেন সদর উপজেলা বিএনপির সাবেক সাধারণ সম্পাদক আমিনুল ইসলাম মতি, পৌর বিএনপির সাবেক সাধারণ সম্পাদক অ্যাডভোকেট ময়েজ উদ্দিন, জেলা ছাত্রদলের সাবেক আহ্বায়ক সামিরুল ইসলাম পলাশসহ বিএনপি ও সহযোগী সংগঠনের নেতাকর্মীরা।